

5-bob. Eksport

29-modda. Eksport bojxona rejimi

Eksport bojxona rejimi shunday rejimki, bunda O‘zbekiston tovari uni qaytarib olib kirish majburiyatisiz bojxona hududidan tashqariga olib chiqiladi.

Eksport bojxona rejimiga joylashtirilgan va amalda bojxona hududidan olib chiqilgan tovar O‘zbekiston tovari maqomini yo‘qotadi.

30-modda. Tovarni eksport bojxona rejimiga joylashtirish talablari va shartlari

Tovarni eksport bojxona rejimiga joylashtirish talablari va shartlari bojxona to‘lovlarini to‘lash hamda iqtisodiy siyosat choralariga rioya etishdan iboratdir.

Tovarni eksport bojxona rejimiga joylashtirish qonun hujjatlariga muvofiq boshqa talablar va shartlarga rioya etgan holda ham amalga oshirilishi mumkin.

Eksport bojxona rejimiga muvofiq chiqarilgan tovar bojxona deklaratsiyasi ro‘yxatdan o‘tkazilgan kuni qanday holatda bo‘lsa, amalda shunday holatda bojxona hududidan olib chiqilishi lozim, bundan tovar holatining tabiiy eskirishi yoki tashish va (yoki) saqlash normal sharoitlarida kamayishi oqibatida ro‘y bergan o‘zgarishlari mustasno.

31-modda. Tovarni eksport bojxona rejimiga joylashtirish uchun zarur bo‘ladigan hujjatlar

Eksport bojxona rejimiga nisbatan bojxona rasmiylashtiruvi uchun zarur bo‘ladigan hujjatlarning ro‘yxati O‘zbekiston Respublikasi Vazirlar Mahkamasi tomonidan belgilanadi.

Tegishli ruxsat etish xususiyatiga ega hujjatlar mavjud bo'lgan taqdirda eksport qilinadigan tovarlarga nisbatan bojxona organlarining axborot tizimida bunday hujjatlarning mavjudligini bojxona organi mustaqil ravishda tekshiradi.